



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### Epistolarvm Innocentii III. Romani Pontificis Libri Vndecim

Innozenz <III., Papst>

Parisiis, 1682

Roberto Titvli Sancti Stephani in Cœlio monte Presbytero Cardinali  
apostolicæ sedis Legato.

**urn:nbn:de:hbz:466:1-20020**

*copis & Episcopis necnon Abbatibus per Armeniam.*

*In eundem modum Episcopo Pragensi, Episcopo Regensi, & Mayonitanensi, Sertensi, & Miditensi Archiepiscopis, & Episcopo Cofonensi, ita quòd unicuique seorsim.*

*In eundem modum Episcopis per Tusciam & Marchiam Anconitanam & ducatum Spoletini constitutis.*

*In eundem modum Patriarchæ & Archiepiscopis & Episcopis & Abbatibus tam Latinis quàm Græcis per Constantinopolitanam provinciam constitutis.*

*In eundem modum illustri Constantinopolitano Imperatori usque ex se fluctus. Cùm ergo deceat & expediat ut tua imperialis sublimitas ad synodum tam solemnem nuntios dirigat speciales, serenitatem tuam monemus & exhortamur attentius quatenus præscripto termino, vita comite, viros idoneos dirigere non postponas, per quos tuæ nobis aperias beneplacitum voluntatis; quia, quantum cum honestate poterimus, ad tuum libenter & efficaciter intendemus commodum & honorem. Datum.*

*In eundem modum Philippo illustri Regi Francorum. In eundem modum Regibus Aragonum, Navarræ, Castellæ, Legionensi, Portugalsensi, Cypri, Norrvagiæ, Corkariæ, Lumbriensi, Conacciæ, Mindiensi, Suetiæ, ita quòd unicuique seorsim.*

*In eundem modum Magistro & fratribus militiæ Templi. Vineam Domini Sabaoth &c. usque, donum perfectum, universis Archiepiscopis & Episcopis ac aliis Ecclesiarum Prælati per universas ferè Christianorum provincias constitutis per apostolica scripta præcipiendo mandamus ut se ipsos taliter præparent &c. verbis competenter mutatis, usque requirendus. Injungant etiam Archiepiscopi & Episcopi ex parte nostra universis Ecclesiarum Capitulis &c. usque fluctus. Cùm igitur in hoc generali Concilio sint multa tractanda quæ ad statum vestri ordinis pertinebunt, decet & expedit ut ad idem Concilium viros idoneos destinatis, qui negotia vestra debeant fideliter procurare.*

*In eundem modum Magistro & fratribus Hospitalis Hierosolymitani.*

*In eundem ferè modum Abbati & conventui Cifericiensi, & Abbati & conventui Præmonstratensi, unicuique seorsim.*

*In eundem modum Capitulo Constantinopolitano usque cùm modestia & cautela. Qui verò canonica fortè præpeditione detenti personaliter venire nequiverint, idoneos*

pro se dirigant responsales; nec quisquam superfluas &c. usque requirendus. Ideoque discretioni vestræ per apostolica scripta mandamus quatenus ei qui auctore Deo Constantinopolitanæ Ecclesiæ præsidebit, ex parte nostra quæ præmissa sunt fideliter nuntietis, ut & ipse juxta præscam formam nostro se conspectui repræsentet; nihilominus de collegio vestro viros idoneos pro vobis ad hoc sacrum Concilium transmissuri, cùm nonnulla sint in ipso tractanda quæ specialiter ad Ecclesiarum Capitula pertinebunt. Interim verò per vos ipsos & alios viros prudentes &c. usque perferatis examen. Nullus itaque se fallaciter usque ex se fluctus. Datum.

*ARCHIEPISCOPIS, EPISCOPIS, Abbatibus, Prioribus, ceterisque Clericis per regnum Franciæ constitutis.*

**P**ium & sanctum propositum quod de subventionem terræ sanctæ pro communi utilitate Deo inspirante concepimus & perducere satagimus ad effectum, ex generalibus litteris poteritis advertere manifestè. Ad hoc igitur salutare propositum exequendum dilectum filium nostrum Robertum tituli sancti Stephani in Cælio monte Presbyterum Cardinalem apostolicæ sedis Legatum, virum utique probatè honestatis & fidei, destinamus, merito suæ probitatis speciali gratia nobis acceptum, per apostolica vobis scripta præcipiendo mandantes quatenus eum vice nostra, immo potius vice Christi, devotè suscipere ac honestè tractare curetis, ipsius salubribus monitis & mandatis humiliter intendentes, præsertim in iis quæ pertinent ad subsidium terræ sanctæ. Nos enim quod super iis & aliis ad suæ legationis officium pertinentibus provida deliberatione statuerit præcipimus inviolabiliter observari, concedentes eidem ut evellat & destruat, ædificet atque plantet, quæ sibi evellenda & destruenda, ædificanda occurrerint & plantanda. Datum &c.

*ROBERTO TITVLI SANCTI Stephani in Cælio monte Presbytero Cardinali apostolicæ sedis Legato.*

**V**T efficacius possis intendere ad subsidium terræ sanctæ, præsentium tibi auctoritate concedimus ut iis qui ad tuam vocationem devotè convenerint ad audiendum verbum salutiferæ crucis, de injunctis sibi pœnitentiis vice nostra certam valeas indulgentiam impertiri. De torneamentis autem hoc tibi duximus con-

## Romani Pontificis Lib. XVI. 759

cedendum, ut de virorum prudentum consilio salubriter statuas quod terræ sanctæ utilitati secundum Deum videris expedire. Datum &c.

### ILLVSTRI REGI Francorum.

**Q**uam sincerum dilectionis affectum erga te ac filium tuum & regnum Franciæ habeamus novit ille qui testis est in cælo fidelis, cujus super hoc testimonium securè possumus invocare. Adeo quippe regni tui exaltationem diligimus, privilegiata semper opera commendantes quæ processerunt de ipso, quod æquanimis Ecclesiæ Romanæ quam ipsi regno sustineremus magnum aliquid adversitatis accidere, cum facilis hæc quam illud ab imminenti posset periculo liberari. Vt ergo super hoc amplius securus reddaris & certus, mittimus ad tuam regalem præsentiam dilectum filium nostrum Robertum tituli sancti Stephani in Cælio monte Presbyterum Cardinalem apostolicæ sedis Legatum, virum utique probatæ honestatis & fidei, qui ea quæ plenius accepit à nobis, expressius tibi referat viva voce; ferentatem tuam rogantes & exhortantes in Domino quatenus eum benignè recipias & honestè pertractes, ipsius acquiescendo salubribus monitis & consiliis propter Deum. Datum.

*In eundem modum nobili viro Ludovico carissimi in Christo filij nostri Philippi Regis Francorum illustris primogenito.*

*In eundem modum nobili mulieri Blanca uxori nobilis viri Ludovici carissimi in Christo filij nostri illustris Regis Francorum primogeniti.*

### P A T R I A R C H Æ Alexandrino.

**E**X litteris quas aliquotiens tua nobis fraternitas destinavit & aliis quoque iudiciis cognovimus evidenter te non solum ad sacrosanctam Romanam Ecclesiam matrem tuam, verum etiam ad personam nostram specialiter devotionem habere debitam & devotam. Propter quod habentes te in visceribus caritatis, tibi compatimur in tribulationibus quas pateris & pressuris: quamquam & tibi & nobis sit in eis potius gloriandum, cum id quod in præsentem est momentaneum & leve tribulationis hujusmodi, supra modum in sublimitate pondus æternæ gloriæ operetur, nec sint condignæ passiones hujus temporis ad futuram gloriam revelandam in illis qui pro Christi

nomine patiuntur. Propter quod Apostolus sibi placebat in infirmitatibus suis, in contumeliis, in necessitatibus, in persecutionibus, & angustiis quas sustinebat pro Christo, & cum infirmabatur, tunc maxime potens erat, sciens quod virtus in infirmitate perficitur, & quod licet per eam homo corrumpatur exterior, interior tamen per eandem jugiter renovatur. Timentibus enim Deum omnia cooperantur in bonum, qui suos non solum de tribulationis angustia liberat, sed etiam in ipsa tribulatione dilatat, ut quasi meridianus fulgor confurgat eis ad vesperam, & cum se consumptos putaverint, ut lucifer orientur. Benedicas igitur Deo & patri Domini nostri Jesu Christi, qui te in omni benedictione spiritali secundum gratiæ suæ divitias benedixit, & ut esses immaculatus in conspectu ipsius, dedit tibi ut non solum credas in Christum, sed pro Christo etiam patiaris. Porta ergo, carissime frater, in corpore tuo stigmata Jesu Christi, per quem mundus tibi crucifixus est & tu mundo. Stabilis esto, & adversus mundanas adversitates immobilis, abundans in opere Dei semper, sciens quod labor tuus non est inanis in Domino, & sicut in te Christi passiones abundant, ita & per Christum abundet consolatio tua, qui te supra id quod potes non patietur tentari, sed faciet in ipsa tentatione proventum, ut valeas sustinere; cum jam ipso docente didiceris in quibus esse sufficiens, & cum Apostolo scias fatiari, scias & esurire, & abundare, & penuriam pati, ac possis in eo qui te confortat omnia tolerare. Fideles quoque ab infidelibus in captivitate detentos sedulis exhortationibus corrobora & confirma, ne deficiant in tribulationibus suis, sed cogitantes in lucta victoriam & præmium in labore, bonum certamen certare non desinant, & cursum servando fidem feliciter consummare; ut de reliquo coronam justitiæ merito valeant expectare, quam reddet eis in illa die Dominus justus iudex; scientes quod nos ad liberationem eorum studium diligens & operam efficacem, si desuper datum fuerit, satagimus adhibere. Denique ad tuam duximus notitiam perferendum quod cum inter omnia desiderabilia cordis nostri duo in hoc seculo principaliter affectemus, ut ad recuperationem videlicet terræ sanctæ ac reformationem universalis Ecclesiæ valeamus intendere cum effectu, hoc ad exequendum prædicta de fratrum nostrorum consilio providimus faciendum, ut sciueret

Epist. 33.  
Et commendat  
Legatum apo-  
stolicum.

Epist. 34.  
Consolatur eum,  
& invitat ad  
Concilium.